

Nama Reti Kristen?

Jaku Tangkan

Jaku Tangkan

1. Tang mayuh orang bepikir, “oh manah tu laban aku udah dilepas ari ukum penyai/dosa, nyadi aku ulih ngaga pengawa nitih ka peneka ati aku lalu pengelepas enda lenyau ari aku!” Paul nangkan kitai ba (**Galatia 3:2-5**); ²*Aku deka nemu utai tu ari kita; Kati kita nyambut Roh Allah Taala laban kita ngereja utai nunda ti di-asuh dalam Adat, tauka arap ka utai ti didinga kita (arap ka Injil)?* ³*Kati ko kita bangat beli! Kita belabuh idup ulih Roh Kudus; Kati kita diatu agi deka nguji ngemansang (ngemanah) ka diri nitih peneka tubuh (pengingin ati ti amu).* ⁴*Kati semua pemedis ti udah di-asai ka kita nadai reti mimit? Enti utai nya amat nadai reti!* ⁵*Kati Allah Taala meri kita Roh IYA lalu ngaga kereja ajih ba kita, laban kita ngereja pengawa nitih ka Adat, tauka laban kita arap ka utai ti didinga kita (arap ka Injil)?*
 - a) Lebu kitai berengkah idup nyadi orang kristian, kitai idup ulih kuasa Roh Kudus, ulih nya kitai mega idup dalam Roh Kudus. Anang nguji mulai ka diri ngagai adat ti lama, ti ngujung ka kitai enda bebas dalam Tuhan. Enti kitai agi nitih ka adat lama (tradisi aki ini), nama reti Tuhan ngelepas ka kitai ari di tanchang dosa? Nya alai kitai patut ngasai ka diri mansang dalam Tuhan ukai kategal agi ngena tauka ngasi ka adat lama (puchau, dukun, ubat lama), tang kategal Allah Taala ti bekereja dalam kitai ngena kuasa Roh IYA. Nya kebuah kitai ngereja utai ti badas, laban ulih kitai ti arap ka Injil.
 - b) Sua kitai orang kristian, agi beguna ka manang, dukun enggau bepiring, laban agi mabu ba pengarap. Mayuh kitai ngasai ka nyadi Kristian semina deka ngulih ka nama ti nyadi orang kristian, kategal enti idup ba nengeri, enggai ka nadai pendam alai ngubur ka ‘bangkai’. Lalu sekeda ngambi nama (gelar) aja, enggai ka dikumbai orang nadai agama. **NYA PENGAWA TI SALAH!**
 - c) Kitai nerima Roh TUHAN, ukai kategal kitai ti agi ngasi ka adat lama, tang kategal kitai ti ninga lalu arap ka Injil. Roh Kudus meri kitai Kristian kuasa ti besai, ngambi ka ulih idup dalam TUHAN. Lebu kuasa Roh Kudus majak nambah (betumbuh) dalam kitai, dia kitai senang amat ngelala utai ti bendar enggau ti bula. Laban Iya ngajar kitai nyadi orang ti bepenemu, lalu ngiring kitai nengah jalai ti ngena.
 - d) Mayuh orang nguji deka besemak enggau Tuhan, tang sida agi nitih ka adat lama. Laban sida agi ngasai ka bedau tentu selamat, ulih ti semina arap aja tang enda mereti ka Injil tu ti bendar. Dikena nyeliah ka pengawa ti agi deka pulai sereta nitih ka adat lama, genap iko kitai patut bisi disiplin kadiri empu, ianya, selalu macha enggau belajar Bup Kudus, selalu besampi, selalu bekaul enggau sida ti bepenemu pasal pengarap kristian.
2. Reti jaku pengelepas tu ianya: nadai agi pengidup ka penuh enggau dosa ke udah digaga ngelamatu, lalu kitai ulih idup nitih ka chara pengidup ke semak kaul enggau

Nama Reti Kristen?

Tuhan. Kitai tu udah nyadi orang baru, ukai orang lama agi, (**2 Korint 5:17**). Kitai enda tau enda idup baka orang ti baru, nusoi utai ti bendar, anang agi ngelese tauka ngemeli ka orang peneka ati, badu agi begedi ati, tang kembuan ati ti nelap enggau pangan diri, (**Epesus 4:23-27**). ²³*Runding kita enda tau enda digaga baru.* ²⁴*Kita enda tau enda idup baka orang ti baru, ti udah digaga nunda peneka Allah Taala, lalu mandang ka diri empu pengidup ti bendar, ti lurus sereta tuchi.* ²⁵*Nya alai anang agi bula! Genap iko orang enda tau enda nusoi utai ti bendar ngagai pangan diri, laban kita semua tu perengka ba siti tubuh.* ²⁶*Enti kita ringat anang ngasuh pengeringat kita mai kita bedosa; anang ringat apus hari.* ²⁷*Anang meri awak ngagai Sitan.* ²⁸*Orang ti selalu ngenchuri, enda tau enda badu ngenchuri, tang belabuh gawa ngena jari iya enggau jalai badas awak ka ulih bekunsi enggau sida ti seranta.* ²⁹*Anang ngena jaku ti tau ngemedis ka orang ari mulut kita. Kena jaku ti siru, penemu ti tau dikena ngemansang ka pengidup orang, ngambi ka utai ti disebut kita tau pulai ka pemanah sida ti ninga kita.* ³⁰*Anang ngasuh Roh Kudus Allah Taala tusah, laban ulih Roh Kudus nya, Allah Taala ngechap kita nyadi ka enggi IYA datai ngagai maya timpuh hari penebus.* ³¹*Buai ati ti pedis, ti nganu enggau ti ringat, ati ti deka belaya, ti betenah sereta semua pengawa ti begedi ka orang. Tang nelap sereta siru enggau pangan diri, ngampun diri sama diri, baka Allah Taala ti udah ngampun kita ulih Kristus.”*

☞ Nyadi tu meh ajar Rasul Paul ngagai kitai semua, awak kitai ngelengka ka pengawa ti lama, lalu idup dalam pengidup ti baru dalam Tuhan.

3. Seagi-agi kitai orang Kristian idup diau ba dunya tu se-agi-agi nya meh penguji selalu datai ngachau kitai, lalu kitai deka terus napi semua utai nya. Tang laban kitai arap ka Kristus udah masu lalu nebus dosa kitai, kitai deka diau dalam pengelurus, lalu pemadas mengkang ba kitai berari, (**1 John 3:6-10**); ⁶*Nya alai semua orang ti diau besaum enggau Kristus enda agi bedosa, tang barang sapa majak bedosa endang nadai udah meda Iya (Kristus) tauka nemu Iya.* ⁷*Anak aku (John bejaku), awak ka nadai siku orang mai kitai limpang. Barang sapa ti ngaga utai lurus, endang lurus, baka Iya (Kristus) ti endang lurus.* ⁸*Barang sapa ti majak bedosa endang enggi Sitan, laban Sitan endang udah bedosa kenya ari mula kalia. Kebuah Anak Allah Taala datai, ngambi ka ngerusak pengawa Sitan.* ⁹*Nadai orang deka majak bedosa enti iya di-ada (di-ada ka ulih Roh Kudus) ka ulih Allah Taala, laban leka benih pengidup ti enggi Allah Taala empu bisi ba iya, lalu kategal nya iya enda ngemansang ka dosa, laban iya udah di ada ka ulih Allah Taala.* ¹⁰*Tu meh gaya kitai tau nemu, sida ti anak Allah Taala enggau ti anak Sitan; barang sapa ti enda ngereja utai ti lurus, enggau enda rindu ka menyadi diri (orang kristian ti bukai) ukai anak Allah Taala.”*

☞ Tu meh gaya pendiau enti kitai amat udah di-empu Tuhan Jesus. Kitai nadai deka ngereja penyalah agi, laban kitai udah nyadi anak TUHAN. Sapa ti anak Allah Taala, endang enggai agi bedosa, laban benih Roh Kudus udah tumbuh enggau galak ba pengidup kitai.

4. Bakanya pan kitai orang kristian deka bulih pemenang ngelaban dosa enti selalu macha Bup Kudus, laban Bup Kudus tu endang bepun ari Allah Taala, ti dikena kitai ngelala penyai enggau pemadas, (**2 Timoti 3:16-17**), besampi ngagai Tuhan berari lalu nitih enggau ati ti bendar ka semua jaku ajar TUHAN ba dalam pengidup enggau pendiau kitai. Lalu mega bersedia nerima jaku ajar ti datai ari Roh Kudus, taluk

Nama Reti Kristen?

ngagai Roh Kudus enggau ngemeran ka jaku ajar ari TUHAN ka ngena kuasa Roh Kudus.

5. Aku tu baru arap ka Jesus, bakani aku deka nemu pengarap tu enggau dalam agi?
 - i. Besulu kaul enggau orang ti bepengarap Kristian.
 - ii. Selalu macha Bup Kudus.
 - iii. Meli bup pasal penerang reti jaku dalam injil, awak ka dikena kitai tau mereti ka Jaku Tuhan enggau lebih dalam agi.
 - iv. Besembiang ngagai rumah gerija tiap-tiap minggu
 - v. Besembiang kadiri tiap hari minta ampun, minta tolong enggau minta berkat ari TUHAN
 - vi. Datai ngagai kelas mansang dalam Kristus (belajar ka Injil)
 - vii. Selalu enggau sembiang gempuru sel

6. Amat meh kita udah dibaptisa, ukai reti kita udah chukop bepenemu nyadi orang Kristian. Kitai patut ngemansang ka diri enggau naka ulih ngereja pengawa TUHAN ngena ati ti baruh, penuh enggau pengeliat ati, ngambi ka kitai ulih tan kena penguji, lalu mansang terus dalam Tuhan.

PENGUJONG; Kati kita udah bisi ngembuan ulah sereta perangai ka ulih nyadi orang Kristian? Kati kita amat udah nerima Jesus nyadi ka Tuhan enggau Pengelepas kitai? Enti bedau, ubah meh pengidup kitai ari diatu, laban jalai ka neraka amat besai, tang jalai ka serega amat sempit, (**Matius 7:13-14**).

Semua kitai mesti ingat, nyadi orang Kristian ukai semina bisi NAMA, ngambi GELAR enggau bisi PENGARAP (agama) aja, tang kitai patut ARAP enggau ati andal, ulih ti amat deka nemu enggau dalam pasal Injil Kristus, nya alai kitai ENDA TAU ENDA; BELAJAR ka Bup Kudus (pansik enggau silik, reti enggau tuju / peneka iya), MERETI enggau dalam (ukai semina ninga orang nusoi aja), TITIH ka Pesan Iya (ukai semina sahari dua), KEREJA nunda ka ajar Iya (anang semina arap aja) enggau bisi PEMUTUS runding (anang agi dua tiga iti ati). "*Laban mayuh orang ti dikangau, tang mimit aja ti dipilih*" (**Matthew 22:14**).

Pengasih Tuhan Jesus Kristus, pengerindu Allah Taala, enggau penyaup Roh Kudus endang meruan enggau kitai semua belama iya. Amin.

.....**ABIS**.....

**Terima kasih
TUHAN merekat kita semua**